

[Augsburg], 21. September 1552

An Johannes Oporinus

UB Basel, Fr. Gr. I 11, fol. 162r.

Steinmann Nr. 663.

Lit.: Husner S. 145.

S. P. D. Vereor, Mi D. Oporine, ne ego et tu simus ἀνθρωποι ἀθλιοι φύσει, et nostra infelicitas Mecaenatis nostri benignitatem vincat. Scripsisti 6 Septembbris te postridie Francofordiam iturum: quo die seruus Domini mei, aut certe altero pòst, tibi 500 f. numerare, et cautionem cuius forma praescripta est, a te recipere debuit. Sed nec tu absens pecuniam accipere potuisti, nec eam tuis numeratam esse probabile est, et seruus decimum nonum diem iam abest, cum ante quinque dies reuersum esse oportuisset. Vnde incerti sumus, an in itinere homini aliquid acciderit, an stultus redditum tuum expectet, an verò cum praeda hac fugam ceperit. Quod si est (quod absit) nescio quid amplius sit sperandum, ego certè saepius interpellare dominum non audebo, ne et tibi nihil prosim, et mihi noceam. Sed re adhuc incerta, meliora sperabimus. Isocratem mittam cum primum potero, nam describentium tarditas impedimento mihi est. Placet graeca cum latinis ita coniungi vt in Lascare fecisti. Marginum annotationibus supersedebo propter occupationes meas et temporis breuitatem, sed vel genio defraudato operam dabo, vt et graecum et latinum codicem quam emendatissimum habeas. Praefationem tuam huc mittes quum primum commode poteris. Ciceronianos commentarios placere domino saepius iam ad te scripsi. Libellos Occonis et Amerpachij cum acceperimus gratias agemus, nunc habemus duntaxat, referemus autem cum ditati fuerimus. Vale. 21. Septembbris Anno 1552.

Hiero[nymus] Wolfius T[uus].